



## **AZIMIO NA. 04/2017**

### **AZIMIO LA BUNGE KURIDHIA MAREKEBISHO YA MKATABA WA NAIROBI WA HIFADHI, USIMAMIZI NA UENDELEZAJI WA MAZINGIRA YA BAHARI NA UKANDA WA PWANI YA MAGHARIBI YA BAHARI YA HINDI – *(AMENDED CONVENTION FOR THE PROTECTION, MANAGEMENT AND DEVELOPMENT OF THE MARINE AND COASTAL ENVIRONMENT OF THE WESTERN INDIAN OCEAN)***

**KWA KUWA,** Mkataba wa Nairobi Kuhusu Hifadhi, Usimamizi na Uendelezaji wa Mazingira ya Bahari na Pwani ya Kanda ya Afrika Mashariki ulipitishwa tarehe 21 Juni, 1985 ukihusisha Nchi tisa ambazo ni: Komoro, Kenya, Somalia, Madagascar, Mauritius, Msumbiji, Shelisheli, Re-Union na Jamhuri ya Muungano wa Tanzania;

**NA KWA KUWA,** Tanzania iliridhia Mkataba huu tarehe 1 Machi, 1996;

**NA KWA KUWA,** Mkataba huu unalenga katika kudhibiti uchafuzi kutokana na vyanzo na shughuli zinazofanyika Nchi kavu na Nchi Wanachama kushirikiana katika kuandaa mipango na mikakati ya pamoja katika kuhifadhi, kusimamia na kuendeleza mazingira ya ukanda wa pwani na bahari;

**NA KWA KUWA,** tangu Mkataba huu uridhiwe na Nchi Wanachama na kuanza kutekelezwa mwaka 1996, kumejitokeza changamoto za mazingira ikiwa ni pamoja na: uchafuzi wa mazingira ya Bahari na Ukanda wa Pwani toka vyanzo na shughuli zinazofanyika Nchi kavu; uharibifu wa maeneo ya Pwani; utupwaji wa taka zenye kemikali za sumu baharini; na athari za mabadiliko ya tabianchi;

**NA KWA KUWA,** katika Mkutano wa Pili wa Nchi Wanachama uliofanyika Port Luis, Mauritius Mwaka 1999, Nchi Wanachama zilizimbia kufanya marekebisho kwenye baadhi ya ibara katika Mkataba wa awali na kuongeza ibara mpya;

**NA KWA KUWA,** marekebisho yanahusu kuongezeka kwa wigo wa vyango vya uchafuzi wa Mazingira ya Bahari na Ukanda wa Pwani kutoka Nchi kavu na ibara zilioongezeka zinahusu kukabiliana na athari za mabadiliko ya tabianchi, kudhibiti utupwaji wa taka zenye kemikali za sumu baharini, ufuatiliaji na uzingatiaji wa utekelezaji wa Mkataba na kuongezeka kwa nchi ya Afrika Kusini kama mwanachama mpya na hivyo kusababisha mabadiliko ya jina la Mkataba na kuwa Mkataba wa Nairobi Kuhusu Hifadhi, Usimamizi na Uendelezaji wa Mazingira ya Bahari na Ukanda wa Pwani ya Magharibi ya Bahari ya Hindi (*Amended Convention for the Protection, Management and Development of the Marine and Coastal Environment of the Western Indian Ocean*);

**NA KWA KUWA,** marekebisho ya Mkataba yalitiwa saina tarehe 1 Aprili, 2010 mjini Nairobi na Nchi Wanachama ikiwemo Tanzania;

**NA KWA KUWA,** marekebisho haya yatawezesha Nchi Wanachama kuchukua hatua zaidi katika utekelezaji wa Mkataba ikiwa ni pamoja na uandaaji wa mikakati ya kikanda katika kukabiliana na changamoto hizo;

**NA KWA KUWA,** ni muhimu nchi yetu kuridhia marekebisho ya Mkataba huu, ili iendelee kunufaika na ushirikiano wa kikanda na kimataifa katika kukabiliana na changamoto mpya za usimamizi na hifadhi ya mazingira zinazokabili maeneo ya Bahari na Ukanda wa Pwani;

**NA KWA KUWA,** hatua hii itasaidia kuboresha hifadhi, usimamizi na uendelezaji wa Mazingira ya Pwani na Bahari ya Hindi;

**NA KWA KUWA,** Tanzania kwa kuweka saina Mkataba huu na hatimaye kuutekeleza itanufaika na mambo yafuatayo:-

- (a) kuimarisha hali ya uchumi wa nchi, kipato cha jamii za Ukanda wa Pwani na afya ya Wananchi kwa ujumla;

- (b) kuwa na mpago wa pamoja wa utekelezaji wa Mkataba utakoandaliwa;
- (c) kuimarisha mikakati na miongozo inayohusika na kuboresha na kuhifadhi na kusimamia Mazingira ya Bahari na Ukanda wa Pwani;
- (d) kuongezeka kwa bioanuai za Bahari na Ukanda wa Pwani kwa kudhibiti ufafanuzi unaotokana na shughuli zinazofanyika nchi kavu;
- (e) kuongezeka kwa ubora wa maji kwenye Bahari kwa kudhibiti utupaji wa taka zenye kemikali za sumu baharini;
- (f) kuongezeka kwa kipato cha jamii za Ukanda wa Pwani kutokana na kuongezeka kwa mazao ya bahari;
- (g) kuongezeka kwa uwezo wa jamii za Ukanda wa Pwani katika kuhimili athari za mabadiliko ya tabianchi na kupunguza shughuli zinazosababisha mabadiliko ya tabianchi; na
- (h) kuimarika kwa ushirikiano wa kikanda kutokana na kuwa na mipango ya pamoja, programu na miradi ya kikanda inayolenga hifadhi ya mazingira ya bahari na Ukanda wa Pwani.

**HIVYO BASI,** kwa kuzingatia umuhimu na manufaa ya Itifaki hii kwa Tanzania, Bunge katika Mkutano wa Saba na kwa mujibu wa Ibara ya 63(3)(e) ya Katiba ya Jamhuri ya Muungano wa Tanzania ya mwaka 1977, linaazimia kuridhia Marekebisho ya Mkataba wa Nairobi wa Hifadhi, Usimamizi na Uendelezaji wa Mazingira ya Bahari na Ukanda wa Pwani ya Magharibi ya Bahari ya Hindi, yaani *"Amended Convention for the Protection, Management and Development of the Marine and Coastal Environment of the Western Indian Ocean."*

**Limepitishwa na Bunge leo tarehe 29 Juni, 2017**

Dkt. Thomas D. Kasilillah  
**KATIBU WA BUNGE**